
P R A V I L N I K
o upotrebi i izradi izvoda iz Centralnog biračkog spiska

Sarajevo, maj 2022. godine

Na osnovu člana 2.9. stav (1) tačka 2, a u skladu s Poglavljem 3. Izbornog zakona Bosne i Hercegovine (“Službeni glasnik BiH”, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20), Centralna izborna komisija Bosne i Hercegovine je na 17. sjednici, održanoj 04.05.2022. godine, donijela

P R A V I L N I K o upotrebi i izradi izvoda iz Centralnog biračkog spiska

POGLAVLJE I. UVODNE NAPOMENE

Član 1. (Primjena)

Pravilnikom o upotrebi i izradi izvoda Centralnog biračkog spiska (u dalnjem tekstu: Pravilnik) iz se utvrđuju:

- a) rokovi i način za zaključivanje i potvrđivanje konačnog Centralnog biračkog spiska i rokovi za dostavljanje podataka o promjenama u evidencijama raseljenih lica i evidenciji državljana koji glasaju van Bosne i Hercegovine (član 3.6 stav (6) tačka a) i b) Izbornog zakona BiH),
- b) način, odgovornost za rad, rok za uspostavljanje i druga bitna pitanja za rad Centra za birački spisak (član 3.8 stav (5) Izbornog zakona BiH),
- c) sadržaj i forma obrasca zahtjeva za određivanje ili promjenu biračke opcije (član 3.9 stav (5) Izbornog zakona BiH),
- d) sadržaj i forma izvoda iz Centralnog biračkog spiska koji se koriste za provođenje izbora (član 3.7 Izbornog zakona BiH),
- e) postupak i način slanja, primanja, obrade, arhiviranja i zaštite elektronskih prijava i dokumenata (član 3.15 stav (5) Izbornog zakona BiH) i
- f) forma obrasca prijave iz člana 3.15 stav (1), (2) i (3) Izbornog zakona BiH, način i postupak kojim se provjerava tačnost podataka u dokumentima koja podnesu izbjegla lica, te uputstva vezana za postupak upisa birača u izvod iz Centralnog biračkog spiska za glasanje van BiH (član 3.15 stav (8) Izbornog zakona BiH).

Član 2. (Pojmovi)

Pojedini izrazi korišteni u ovom Pravilniku znače:

- a) “Privremeni birački spisak” podrazumijeva izvod iz evidencije Centralnog biračkog spiska koji se koristi u svrhu omogućavanja uvida javnosti u podatke iz Centralnog biračkog spiska.
- b) “Konačni birački spisak” podrazumijeva evidenciju o biračima koji imaju biračko pravo za izbore u BiH.
- c) “Izvod iz zaključenog konačnog Centralnog biračkog spiska” sadrži podatke iz Centralnog biračkog spiska za provedbu izbora u BiH.

“Ovlašteni predstavnik političkog subjekta” podrazumijeva lice ovlašteno za zastupanje političke stranke koje je upisano u sudski registar, nezavisnog kandidata, lice ovlašteno od

svih predsjednika političkih stranaka članica koalicije i lice ovlašteno od svih nezavisnih kandidata članova liste nezavisnih kandidata.

- d) "Kombinacija" je set svih glasačkih listića za sve nivoe vlasti za koje se provode izbori, koje birač na biračkom mjestu preuzme od člana biračkog odbora koji izdaje glasačke listiće.
- e) "Izvod iz Centralnog biračkog spiska za glasanje van BiH" sadrži podatke o licima državljanima BiH koja su registrirana da glasaju izvan BiH.

POGLAVLJE II. ROKOVI ZA DOSTAVLJANJE I ZAKLJUČIVANJE CENTRALNOG BIRAČKOG SPISKA

Član 3.

(Rokovi za zaključivanje i potvrđivanje konačnog Centralnog biračkog spiska – član 3.6 stav (6) tačka a) Izbornog zakona BiH)

(1) Centralna izborna komisija BiH zaključuje i potvrđuje Centralni birački spisak sa stanjem na sljedeće dane:

- a) dan prije raspisivanja izbora sa stanjem u 24.00 sata,
- b) za birače koji glasaju van BiH, 75 dana prije dana održavanja izbora u 24.00 sata,
- c) za birače koji glasaju na redovnom biračkom mjestu, 45 dana prije dana održavanja izbora u 24.00 sata i
- d) na dan održavanja izbora u 24.00 sata.

(2) Sve promjene koje su nastale nakon roka utvrđenog u stavu (1) ovog člana, neće biti sadržane u zaključenom i potvrđenom Centralnom biračkom spisku.

(3) Odluka o zaključivanju i potvrđivanju Centralnog biračkog spiska sadrži datum i ukupan broj upisanih birača po izbornim jedinicama, a objavljuje se u službenim glasilima. Sastavni dio ove odluke je Centralni birački spisak u elektronskom obliku, utvrđen ovom odlukom, koji će se koristiti za izbore, a koji se neće objaviti u službenim glasilima.

(4) Odluku o zaključivanju Centralnog biračkog spiska za birače koji glasaju putem mobilnog tima Centralna izborna komisija BiH će utvrditi posebnom odlukom.

Član 4.

(Rokovi i način za dostavljanje podataka o promjenama u evidencijama raseljenih lica i evidenciji državljana koji glasaju izvan Bosne i Hercegovine – član 3.6 stav (2) tačka b) i c) i član 3.6 stav (6) tačka b) Izbornog zakona BiH)

(1) Ministarstvo za ljudska prava i izbjeglice BiH, na zahtjev Centralne izborne komisije BiH, dostavlja podatke o promjenama u evidencijama raseljenih lica, uključujući i ispravke nepotpunih podataka (slovne greške u imenu ili prezimenu, greške u broju u JMB i slično) u elektronskoj formi i ispisu, kvartalno u neizbornoj godini, a u izbornoj godini jednom mjesечно do roka određenog u stavu (3) ovog člana za promjenu biračke opcije raseljenog lica.

(2) Ministarstvo za ljudska prava i izbjeglice BiH dostavlja listu osoba koje su izgubile status raseljene osobe.

(3) Raseljeno lice iz stava (1) ovog člana ima pravo da odredi ili promijeni svoju biračku opciju u nadležnom Centru za birački spisak, najkasnije 75 dana prije održavanja izbora.

(4) Državljanin BiH koji privremeno živi u inozemstvu ili državljanin BiH koji ima status izbjeglog lica iz BiH, prijavu za glasanje izvan BiH podnosi najkasnije 75 dana prije dana održavanja izbora. Ukoliko ne dostavi prijavu u navedenom roku, nalazit će se u izvodu iz Centralnog biračkog spiska na odgovarajućem biračkom mjestu u osnovnoj izbornoj jedinici u kojoj ima prebivalište.

(5) Centralna izborna komisija BiH na pogodan način u izbornom periodu obavještava birače iz stava (2) i (3) ovog člana o načinu i rokovima upisa, određivanja ili promjeni biračke opcije.

POGLAVLJE III. CENTAR ZA BIRAČKI SPISAK

Član 5.

(Uspostava i rad Centra za birački spisak – član 3.8 stav (4) i (5) Izbornog zakona BiH)

(1) U svakoj općini, gradu i Brčko distriktu BiH nadležni organ uspostavlja Centar za birački spisak.

(2) Nadležni organ iz stava (1) ovoga člana, donosi akt o uspostavljanju Centra za birački spisak u kojem utvrđuje: njegovu unutrašnju organizaciju i sistematizaciju, način rukovođenja, ovlaštenja, odgovornost za rad Centra za birački spisak i njegovih zaposlenih i ostala pitanja bitna za rad ovog Centra.

(3) Uredi u kojima se vode i čuvaju matične knjige, kao i drugi uredi dostupni javnosti mogu služiti kao Centar za birački spisak i kao takvi moraju biti vidno označeni.

Član 6.

(Oprema – član 3.8 stav (5) Izbornog zakona BiH)

Centar za birački spisak uspostavlja se u prostoriji koja će biti opremljena, pored ostalog, i jednim računaram koji će se koristiti za potrebe Centra, telefonskom linijom s direktnim izlazom, te internet-konekcijom i aplikacijom za vođenje Centralnog biračkog spiska.

Član 7.

(Obuka – član 3.8 stav (2) Izbornog zakona BiH)

Pored obuke osoblja Centra za birački spisak koju vrši nadležni općinski organ u saradnji s općinskom izbornom komisijom, obuku ovog osoblja vrši i Centralna izborna komisija BiH, u saradnji sa izbornom komisijom osnovne izborne jedinice, u slučaju posebnih specijalističkih obuka koje su utvrđene u Planu i programu edukacije članova organa za provedbu izbora Centralne izborne komisije BiH

Član 8.

(Nadležnosti – član 3.8 stav (3) tačka f) Izbornog zakona BiH)

(1) Pored nadležnosti utvrđenih članom 3.8 stav (3) Izbornog zakona BiH, Centar za birački spisak:

- a) vodi evidenciju o svim naseljenim mjestima i nazivima svih ulica na teritoriji svoje općine i o svim promjenama obavještava izbornu komisiju osnovne izborne jedinice,
- b) učestvuje u realizaciji izlaganja izvoda iz privremenog Centralnog biračkog spiska,
- c) pruža tehničku pomoć izbornoj komisiji osnovne izborne jedinice prilikom imenovanja biračkih odbora (pomoć pri žrijebanju, kod izrade akata o imenovanju, obuke biračkih odbora i sl.),
- d) pruža tehničku pomoć izbornoj komisiji osnovne izborne jedinice prilikom provjere i pripreme biračkih mesta za izbole,
- e) pruža tehničku pomoć izbornoj komisiji osnovne izborne jedinice u kampanji obavještavanja birača o svim segmentima u vezi s izbornim procesom,
- f) raseljenom licu izdaje potvrdu o prijemu zahtjeva iz člana 12. stav (1) ovog Pravilnika,
- g) po podnesenom zahtjevu, izdaje potvrdu biraču iz člana 13. stav (5) ovog Pravilnika i

- h) po potrebi pruža tehničku pomoć izbornoj komisiji osnovne izborne jedinice prilikom objedinjavanja izbornih rezultata na nivou osnovne izborne jedinice i po nalogu ove izborne komisije dostavlja Centralnoj izbornoj komisiji BiH rezultate sa svih redovnih biračkih mesta u elektronskoj verziji, urađenoj u računarskom programu dobijenom od Centralne izborne komisije BiH, za sve nivoe i sve kategorije (po političkim subjektima i kandidatima unutar političkih subjekata).
- (2) Centar za birački spisak podnosi sedmični izvještaj Centralnoj izbornoj komisiji BiH, putem nadležne izborne komisije.
- (3) Izvještaj treba sadržavati podatke o svim izmjenama koje su izvršene u Centralnom biračkom spisku za izvještajni period (ime, prezime, JMB, datum i vrsta izmjene koja je izvršena).

Član 9. (Odgovornost za rad – član 3.8 stav (5) Izbornog zakona BiH)

- (1) Nadležni organ iz člana 5. stav (1) ovog Pravilnika, odgovoran je za rad Centra za birački spisak.
- (2) Zaposleni u Centru za birački spisak su odgovorni za vođenje službenih evidencija, te tačnost i ažuriranje svih podataka koje vodi i osigurava Centar za birački spisak, kao i za druge poslove iz nadležnosti Centra za birački spisak utvrđene Izbornim zakonom BiH i ovim Pravilnikom.
- (3) Izborna komisija osnovne izborne jedinice nakon kontrole, ukoliko utvrdi nepravilnosti, pokrenut će postupak po službenoj dužnosti protiv zaposlenog u Centru za birački spisak koji krši prava birača ili političkog subjekta, u skladu s članom 6.2 stav (2) Izbornog zakona BiH i odredbama ovog Pravilnika.

Član 10. (Radno vrijeme – član 3.8 stav (5) Izbornog zakona BiH)

- (1) Redovno radno vrijeme Centra za birački spisak jednako je radnom vremenu organa uprave osnovne izborne jedinice.
- (2) Ako se u određenom periodu poveća obim posla, nadležni organ iz člana 5. stav (1) ovog Pravilnika, samostalno ili na prijedlog izborne komisije osnovne izborne jedinice, može naložiti da Centar za birački spisak radi i duže od redovnog radnog vremena, kao i da radi u neradne dane, u smjenama i s više izvršilaca.
- (3) Centar za birački spisak je obavezan na pogodan način obavijestiti birače o radnom vremenu Centra za birački spisak.

POGLAVLJE IV. BIRAČKA OPCIJA

Član 11. (Sadržaj i forma obrasca zahtjeva za promjenu biračke opcije PBO-1 – član 3.9 stav (5) Izbornog zakona BiH)

- (1) Zahtjev za promjenu biračke opcije raseljeno lice podnosi lično na PBO-1 obrascu zahtjeva za promjenu biračke opcije za raseljena lica, koji je sastavni dio ovog Pravilnika.
- (2) Uz popunjeno i potpisano obrazac PBO-1 raseljeno lice dužno je zaposlenom nadležnog centra za birački spisak lično predočiti jedan od važećih originalnih dokumenata iz člana 5.12 stav (4) Izbornog zakona BiH, radi identifikacije, a u spis koji vodi nadležni Centar za birački spisak priložiti kopiju predočenog identifikacionog dokumenta.

Član 12.
(Način prijema zahtjeva i rokovi – član 3.9 stav (5) Izbornog zakona BiH)

- (1) Zaposleni nadležnog Centra za birački spisak će raseljenom licu koje je podnijelo zahtjev za promjenu biračke opcije izdati potvrdu o prijemu zahtjeva.
- (2) Nakon što utvrdi identitet podnosioca zahtjeva iz stava (1) ovog člana, zaposleni nadležnog Centra za birački spisak izvršit će provjeru podataka koji se vode u službenim evidencijama o prebivalištu podnosioca zahtjeva prema popisu iz 1991. godine.
- (3) Po provedenim radnjama iz stava (1) i (2) ovog člana, zaposleni nadležnog Centra za birački spisak svojim potpisom ovjerava autentičnost unesenih podataka.
-
- (4) U periodu održavanja redovnih izbora za organe vlasti u BiH, zahtjev se mora podnijeti najkasnije u roku utvrđenom u članu 4. stav (2) ovog Pravilnika, kako bi se promjene biračke opcije ažurirale.

Član 13.
(Postupak i podnošenje zahtjeva PBO-2 za promjenu biračke opcije – član 3.16 stav (4) i 5.18 stav (1) Izbornog zakona BiH)

- (1) Zahtjev za promjenu biračke opcije državljanin BiH iz člana 3.16 Izbornog zakona BiH podnosi nadležnom Centru za birački spisak putem PBO-2 obrasca zahtjeva za promjenu biračke opcije za birače koji su glasali izvan BiH, najkasnije u roku utvrđenom u članu 4. stav (3) ovog Pravilnika, po proceduri iz člana 11. ovog Pravilnika. Centar za birački spisak će, putem izborne komisije, sve obrasce zahtjeva za promjenu biračke opcije birača koji su upisani za glasanje izvan BiH dostaviti Centralnoj izbirnoj komisiji BiH najkasnije u roku od sedam dana od dana njihovog prijema, radi ažuriranja promjena biračke opcije birača u odgovarajućem izvodu iz Centralnog biračkog spiska.
- (2) Uz popunjeno i potpisano obrazac PBO-2 koji je sastavni dio ovog pravilnika, birač je dužan zaposlenom nadležnog Centru za birački spisak lično predložiti jedan od važećih originalnih dokumenata iz člana 5.12 stav (4) ili iz člana 3.15 stav (4) Izbornog zakona BiH ukoliko se radi o izbjeglogu licu, radi identifikacije, a u spisu koji vodi nadležni Centar za birački spisak priložiti kopiju predloženog identifikacionog dokumenta.
- (3) U periodu održavanja redovnih izbora za organe vlasti u BiH, zahtjev se mora podnijeti najkasnije u roku utvrđenom u članu 4. stav (3) ovog Pravilnika, kako bi se promjene biračke opcije ažurirale u evidenciji Centralnog biračkog spiska. Zahtjevi koji budu primljeni nakon ovog roka bit će obrađeni nakon održavanja izbora.
- (4) Centralna izbirna komisija BiH dostavlja centru za birački spisak, putem nadležne izborne komisije, spisak birača koji su registrirani za glasanje putem pošte za tu osnovnu izbornu jedinicu, kako bi birači ostvarili pravo glasa nepotvrđenim – kovertiranim glasačkim listićima, u skladu s članom 5.18 stav (1) Izbornog zakona BiH.
- (5) Državljanin BiH koji ima biračko pravo, a ne nalazi se u zaključenom izvodu iz Centralnog biračkog spiska, podnosi zahtjev Centru za birački spisak koji će mu nakon provjere, izdati potvrdu ovjerenu pečatom izbirne komisije osnovne izborne jedinice i uputiti ga da glasa na biračkom mjestu određenom za glasanje nepotvrđenim – kovertiranim glasačkim listićima.

POGLAVLJE V. IZVODI IZ CENTRALNOG BIRAČKOG SPISKA

Član 14.

(Forma i sadržaj izvoda iz Centralnog biračkog spiska koji se koriste za provođenje izbora - član 3.10 stav (3), a u vezi s članom 20.8 Izbornog zakona BiH)

(1) Na osnovu elektronske evidencije Centralnog biračkog spiska, koja je sastavni dio odluke iz člana 3. stav (3) ovog Pravilnika, Centralna izborna komisija BiH izrađuje:

- a) izvode iz konačnog Centralnog biračkog spiska za birače koji glasaju na redovnom biračkom mjestu,
- b) izvode iz konačnog Centralnog biračkog spiska za birače koji glasaju putem pošte,
- c) izvode iz konačnog Centralnog biračkog spiska za birače koji glasaju u diplomatsko-konzularnom predstavništvu BiH (u dalnjem tekstu: DKP BiH),
- d) izvode iz konačnog Centralnog biračkog spiska za birače koji glasaju u odsustvu i
- e) spisak birača koji glasaju nepotvrđenim-kovertiranim glasačkim listićima, a odnosi se na birače koji su upisani da glasaju izvan BiH, a na dan održavanja izbora se zateknu u zemlji, birače koji nakon zaključenja Centralnog biračkog spiska napune 18 godina, a ime im se ne nalazi na izvodu iz Centralnog biračkog spiska, te birače sa prebivalištem u Brčko distriktu BiH čije se ime ne nalazi na izvodu iz Centralnog biračkog spiska, a kojima se omogućava glasanje nepotvrđenim-kovertiranim glasačkim listićima ukoliko birač priloži potvrdu koju je izdao Centar za birački spisak, kojom se potvrđuje da se njegovo ime ne nalazi upisano ni na jednom izvodu iz Centralnog biračkog spiska i uvjerenje o entitetskom državljanstvu.

(2) Na osnovu podataka koje dostavi izborna komisija osnovne izborne jedinice (u dalnjem tekstu: izborna komisija) i odluke iz člana 3. stav (4) ovog Pravilnika, Centralna izborna komisija BiH izrađuje:

- a) izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta i
- b) izvod iz konačnog Centralnog biračkog spiska za birače koji su zatvorenici ili su vezani za ustanove, a imaju biračko pravo.

(3) Centralna izborna komisija BiH će na zahtjev organa lokalne samouprave izraditi i dostaviti odgovarajući izvod iz Centralnog biračkog spiska za potrebe organizacije i provođenja referendumu, opoziva izabranog zvaničnika i izbora organa lokalne samouprave.

(4) Podaci u izvodu iz Centralnog biračkog spiska štampat će se na jezicima i pismima koji su u službenoj upotrebi u BiH.

(5) U izvodu iz konačnog Centralnog biračkog spiska označen je datum njegovog zaključivanja i napomena da promjene izvršene poslije tog datuma nisu uzete u obzir.

Član 15.

(Sadržaj izvoda iz Centralnog biračkog spiska – član 3.10 stav (3) Izbornog zakona BiH)

(1) Izvod iz Centralnog biračkog spiska za birače koji glasaju na redovnom biračkom mjestu sadrži sljedeće podatke:

- a) prezime i ime i ime jednog roditelja birača,
- b) datum rođenja,
- c) spol,
- d) JMB i JMB u obliku bar-koda,

- e) naziv općine, grada, odnosno Brčko distrikta BiH,
 - f) naziv i šifru biračkog mjesta i broj kombinacije: A ili B za birače koji glasaju u Brčko distriktu BiH
 - g) rubriku za potpis glasača.
- (2) Izvod iz Centralnog biračkog spiska za raseljena lica sadrži sljedeće podatke:
- a) prezime i ime i ime jednog roditelja birača,
 - b) datum rođenja,
 - c) spol,
 - d) JMB i JMB u obliku bar-koda,
 - e) općina za koju glasa i
 - f) rubriku za potpis birača, koja sadrži oznaku kombinacije.

(3) Izvod iz konačnog Centralnog biračkog spiska iz člana 14. stav (1) tačka e) identičan je izvodu iz stava (1) ovog člana, s tim što nema upisane podatke o biračima.

(4) Izvod iz Centralnog biračkog spiska iz stava (1) ovog člana, za birače koji glasaju u Brčko distriktu BiH kada se provode izbori navedeni u članu 18.2 alineja 1) i 2) Izbornog zakona BiH, sastoji se iz dva dijela:

- a) dio A birači koji imaju entitetsko državljanstvo Federacije BiH i
- b) dio B birači koji imaju entitetsko državljanstvo Republike Srpske.

Član 16.

(Izlaganje izvoda iz Privremenog biračkog spiska na uvid javnosti – član 3.11 Izbornog zakona BiH)

(1) Centralna izborna komisija BiH sa stanjem na dan raspisivanja izbora sačinjava, u skladu s članom 3.11 Izbornog zakona BiH, izvode iz Centralnog biračkog spiska, koji se dostavljaju izbornim komisijama i Centrima za birački spisak, a koji se izlažu na uvid javnosti u periodu od 120. do 90. dana prije dana održavanja izbora u svrhu izrade konačnih izvoda iz Centralnog biračkog spiska.

(2) Izvod iz stava (1) ovog člana izrađuje se na obrascu koji je sastavni dio ovog Pravilnika, u elektronskoj verziji, po osnovnim izbornim jedinicama i biračkim mjestima sa prethodnih izbora i ne sadrži podatke o jedinstvenom matičnom broju i adresi birača.

Član 17.

(Dostavljanje izvoda – član 3.7 stav (1) Izbornog zakona BiH)

(1) Izvod iz Centralnog biračkog spiska iz člana 16. ovog Pravilnika dostavlja se izbornoj komisiji.

(2) Izborne komisije dužne su izložiti izvode iz Centralnog biračkog spiska iz člana 16. stav (1) ovog Pravilnika, kako bi državljeni BiH s biračkim pravom imali pristup istim i mogli provjeriti i izvršiti ispravku ili dopunu svojih podataka kod nadležnog organa.

(3) Izborne komisije dužne su na pogodan način obavijestiti birače da se izvod iz Centralnog biračkog spiska nalazi u Centru za birački spisak, mjesnim zajednicama i drugim pogodnim mjestima utvrđenim planom izlaganja Privremenog biračkog spiska, kako bi mogli provjeriti i izvršiti ispravku ili dopunu svojih podataka kod nadležnog organa i opredijeliti se za biračku opciju (općina, odnosno mjesto glasanja i način glasanja – lično ili u odsustvu).

(4) Uz izvod iz člana 16. stav (1) Pravilnika, Centralna izborna komisija BiH dostavlja izbornim komisijama i obrazac zahtjeva iz člana 11. ovog Pravilnika kako bi raseljeno lice imalo mogućnost da odabere biračku opciju određenu članom 20.8 Izbornog zakona BiH. Izborne komisije primaju zahtjev od raseljenog lica u roku utvrđenom u članu 4. stav (3) ovog Pravilnika i dostavljaju ga

Centralnoj izbornoj komisiji BiH u elektronskoj formi radi ažuriranja izvoda iz Centralnog biračkog spiska za raseljena lica.

Član 18. (Plan izlaganja izvoda – član 2.13 i 3.11 Izbornog zakona BiH)

(1) Izborne komisije donose plan izlaganja izvoda iz člana 16. ovog Pravilnika. Ovaj plan obuhvata način obavještavanja javnosti o trajanju izlaganja ovog izvoda i mjestima na kojima će izvodi iz Centralnog biračkog spiska biti izloženi, odnosno dostupni, kao i način obavještavanja raseljenih lica o eventualnoj promjeni biračke opcije u centru za birački spisak. Izborne komisije putem plana osiguravaju svim zainteresiranim licima pristup kako bi mogli provjeriti podatke u izvodu iz Centralnog biračkog spiska, te izvršiti njihovu ispravku kod nadležnog organa. Izlaganje izvoda iz Centralnog biračkog spiska traje 30 dana od dana utvrđenog u članu 16. stav (1) ovog Pravilnika.

(2) Izborne komisije objavljuju na pogodan način (internet-stranica, oglasna ploča općine/grada ... i dr.) i dostavljaju planove iz stava (1) ovog člana Centralnoj izbornoj komisiji BiH najkasnije 125 dana prije dana održavanja izbora. Ukoliko Centralna izborna komisija BiH ustanovi da planovima iz stava (1) ovog člana nije utvrđen primjeren način obavještavanja javnosti i raseljenih lica, naložit će izbornoj komisiji poduzimanje dodatnih mjera i aktivnosti.

Član 19.

(Izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta – član 3.14 stav (1) tačka a) Izbornog zakona BiH)

(1) Izvodi iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta sačinjavaju se na osnovu podataka nadležnog organa zaduženog za socijalno staranje i drugih organa koji imaju podatke o ovim licima, te izražene volje ovih birača da na dan izbora glasaju u svojim domovima, što se utvrđuje pisanom izjavom svakog birača i pratećom medicinskom dokumentacijom o bolesti ili invaliditetu birača kao uvjetu za njegovo kućno liječenje.

(2) Dokumentacija iz stava (1) ovog člana sastavni je dio izvještaja koji nadležna izborna komisija dostavlja Centralnoj izbornoj komisiji BiH kao obrazloženje o potrebi glasanja birača s invaliditetom putem mobilnog tima.

(3) Izborna komisija će najkasnije u roku od 40 dana prije dana održavanja izbora pisanim putem zahtijevati od nadležnih organa podatke o svim licima koja su zbog starosti, bolesti ili invalidnosti vezana za svoje domove, a nadležni organ će podatke po zahtjevu izborne komisije dostaviti u roku od 7 dana od dana prijema zahtjeva, radi evidentiranja birača koji su zbog starosti, bolesti ili invalidnosti vezani za svoje domove.

(4) Na osnovu podataka iz stava (2) ovog člana, izborna komisija će, u saradnji s Centrom za birački spisak, sačiniti plan obilaska birača iz stava (1) radi prijedloga upisa u izvod iz Centralnog biračkog spiska za glasanje putem mobilnog tima.

(5) Izborna komisija će, nakon provedenog postupka iz stava (4) ovog člana, sačiniti spisak birača koji su vezani za svoje domove zbog starosti, bolesti ili invaliditeta i dostaviti ga Centralnoj izbornoj komisiji BiH u odgovarajućem elektronskom obliku, unosom podataka u aplikaciju, kao i kopiju dokumentacije iz stava (1) ovog člana, 20 dana prije dana održavanja izbora, radi izrade izvoda iz konačnog Centralnog biračkog spiska. Nakon razmatranja dokumentacije iz stava (1) ovog člana pravilnika, Centralna izborna komisija BiH će utvrditi i sačiniti izvod iz konačnog Centralnog biračkog spiska za ovu kategoriju birača. Izvod iz konačnog Centralnog biračkog spiska Centralna izborna komisija BiH dostavlja nadležnoj izbornoj komisiji u roku od 10 dana, a najkasnije pet dana prije dana održavanja izbora.

(6) Izborna komisija će na osnovu dobijenog izvoda iz konačnog Centralnog biračkog spiska iz stava (5) ovog člana u koloni "potpis", u izvodu u kojem je birač upisan za redovno glasanje, pored imena birača unijeti oznaku MOBILNI TIM.

Član 20.

(Izvod iz konačnog Centralnog biračkog spiska za birače koji su zatvorenici ili su vezani za ustanove, a imaju pravo glasati – član 3.14 stav (1) tačka b) Izbornog zakona BiH)

(1) Izvod iz konačnog Centralnog biračkog spiska za lica koja su zatvorenici ili su vezana za ustanove (kazneno-popravni domovi, pritvorske jedinice, gerijatrijske, distrofičarske ili druge zdravstvene ustanove) i imaju pravo glasati sačinjava se na osnovu podataka dobijenih od ustanova u kojima su ova lica smještena.

(2) Izborna komisija će najkasnije u roku od 40 dana prije dana održavanja izbora, za lica iz stava (1) ovog člana, pisanim putem zahtijevati od nadležnog organa podatke o svim licima koja su vezana za ustanove na području njihove općine odnosno osnovne izborne jedinice.

(3) Organ iz stava (2) ovog člana će najkasnije u roku od 7 dana od dana prijema zahtjeva izbornoj komisiji dostaviti podatke o osobama iz stava (1) ovog člana, koji uključuju: ime, prezime, datum rođenja, JMBG, punu adresu prebivališta, odnosno boravišta za raseljena lica, kao i podatak da li će se ta lica nalaziti u ustanovi na dan održavanja izbora.

(4) Na osnovu podataka iz stava (3) ovog člana izborna komisija će, putem Centra za birački spisak, sačiniti plan obilaska ustanova radi upisa birača u izvod iz Centralnog biračkog spiska za glasanje putem mobilnog tima.

(5) Centralna izborna komisija BiH će na osnovu podataka iz stava (3) ovog člana, sačiniti izvod iz konačnog Centralnog biračkog spiska za birače iz stava (1) ovog člana i dostaviti ga nadležnoj izbornoj komisiji u roku od 10 dana, a najkasnije pet dana prije dana održavanja izbora. Nadležna komisija će, u izvodu za redovno glasanje, pored imena birača upisati MOBILNI TIM – USTANOVA.

(6) Za lica koja nemaju prebivalište u osnovnoj izbornoj jedinici u kojoj se nalazi ustanova iz stava (1) ovog člana, a na dan održavanja izbora će se nalaziti u ustanovi, izborna komisija će odmah, a najkasnije u roku od dva dana, po dobijanju izvoda iz konačnog Centralnog biračkog spiska iz stava (5) ovog člana, nadležnoj izbornoj komisiji, po mjestu prebivališta lica smještenog u ustanovu, dostaviti podatak o tome kako bi ista u rubrici potpis za navedenog birača upisala MOBILNI TIM – USTANOVA.

Član 21.

(Izvodi iz Centralnog biračkog spiska za političke subjekte – član 3.1 stav (4) Izbornog zakona BiH)

(1) Ovlašteni predstavnik političkog subjekta koji ima ovjerenu kandidatsku listu za nivo vlasti, odnosno izbornu jedinicu, može 45 dana prije dana održavanja izbora podnijeti pisani zahtjev za dostavu izvoda iz Centralnog biračkog spiska.

(2) Izvodi iz stava (1) ovog člana izrađuju se prema osnovnoj izbornoj jedinici u kojoj se glasa i sadrže sljedeće podatke:

- a) šifru i naziv osnovne izborne jedinice,
- b) prezime i ime i ime jednog roditelja birača,
- c) datum rođenja,
- d) spol i

e) šifru biračkog mjestra.

(3) Izvode iz ovog člana, Centralna izborna komisija BiH dostavlja u elektronskom obliku.

Član 22.

(Izvodi iz Centralnog biračkog spiska za provođenje opoziva zvaničnika i izbore organa lokalne samouprave – član 3.1 stav (1) Izbornog zakona BiH)

(1) Izvodi iz Centralnog biračkog spiska utvrđeni u članu 14. stavu (3) ovog Pravilnika sadrže sljedeće podatke:

- a) prezime i ime i ime jednog roditelja birača,
- b) datum rođenja,
- c) spol,
- d) naziv općine, grada, odnosno Brčko distrikta BiH
- e) rubriku za potpis glasača i
- f) jedinstveni matični broj birača

(2) Izvodi iz Centralnog biračkog spiska za opoziv zvaničnika izrađuju se pojedinačno za svako biračko mjesto i pored podataka navedenih u stavu (1) ovog člana, sadrže i podatak o biračkom mjestu.

(3) Izvodi iz Centralnog biračkog spiska za izbor organa lokalne samouprave izrađuju se pojedinačno prema naseljenom mjestu (ulici) koje čine odgovarajući organ lokalne samouprave i sadrže pored podataka iz stava (1) ovog člana i podatak o nazivu naseljenog mjesta.

(4) Izvode iz stava (1) ovog člana izrađuje Centralna izborna komisija BiH po zahtjevu nadležnog organa.

(5) Zahtjev iz stava (4) ovog člana nadležni organ dostavlja najkasnije 30 dana prije dana održavanja izbora i uz njega je dužan priložiti odluku o raspisivanja izbora koja obavezno sadrži datum održavanja navedenih izbora, objavljenu u službenim glasilima i akt o određivanju mjesnih zajednica na području općine/grada za koje se provode izbori.

(6) Izvode iz ovog člana Centralna izborna komisija BiH dostavlja u elektronskom obliku i njihovo štampanje vrši nadležni organ za provođenje izbora.

Član 23.

(Posebna oznaka u zaključenom izvodu iz Centralnog biračkog spiska)

Centralna izborna komisija BiH će za sve birače za koje centar za birački spisak u saradnji s nadležnim matičnim uredom utvrdi da se njihova imena nalaze na zaključenom izvodu iz Centralnog biračkog spiska, a provjerama je utvrđeno da se radi o umrloj osobi, za koju je nadležni matični ured izdao izvod iz MK umrlih, u rubrici za potpis glasača iz člana 15. stav (1) tačka g) ovog Pravilnika staviti oznaku: „*“.

POGLAVLJE VI. PRIJAVA BIRAČA ZA GLASANJE IZVAN BIH UPISANIH U CENTRALNI BIRAČKI SPISAK

Član 24.

(Način podnošenja prijava izbjeglih lica i lica na privremenom boravku u inozemstvu upisanih u Centralni birački spisak – član 3.15 Izbornog zakona BiH)

(1) Državljanin BiH koji ima privremeni boravak ili status izbjeglog lica koji je upisan u Centralni birački spisak, da bi se nalazio na izvodu iz Centralnog biračkog spiska za glasanje izvan BiH, dužan je da podnese prijavu za svake izbore kojom se opredjeljuje za glasanje u diplomatsko-konzularnom predstavništvu ili putem pošte, na način utvrđen u članu 3.15 stav (5) Izbornog zakona BiH.

(2) Način podnošenja prijave elektronskim putem vrši se u skladu sa Uputstvom o postupku slanja, prijema, obrade, arhiviranja i zaštite elektronskih prijava državljana Bosne i Hercegovine za glasanje izvan BiH elektronskim putem (u daljem tekstu: Uputstvo).

(3) Ukoliko prijava ne bude podnesena na način utvrđen u članu 3.15 stav (5) Izbornog zakona BiH, Centralna izborna komisija BiH pismeno, faksom ili telefonom određuje podnosiocu prijave rok za otklanjanje utvrđenih nedostataka.

(4) Podnositelj prijave koji ne postupi na način propisan stavom (3) ovog člana, ostati će upisan u Centralni birački spisak za glasanje u Bosni i Hercegovini.

Član 25.

(Izgled i sadržaj obrasca za prijavu PRP – član 3.15 stav (8) Izbornog zakona BiH)

(1) Izgled i sadržaj Obrasca prijave za državljane BiH – PRP kojim se prijavljuju za glasanje je sastavni dio ovog Pravilnika.

(2) Popunjavanje obrasca iz stava (1) ovog člana vrši se elektronski, putem online portala.

(3) Centralna izborna komisija BiH omogućit će pristup online portalu državljanima BiH u skladu sa rokovima utvrđenim ovim Pravilnikom.

Član 26.

(Popunjavanje, potpisivanje i prilaganje obrazaca prijave i dokumentacija)

(1) Obrazac prijave za glasanje izvan BiH mora u cijelosti popuniti podnositelj prijave, a e-mail adresu može koristiti samo jednom i za jednu prijavu.

(2) Nakon popunjavanja obrasca prijave, podnositelj isti štampa i potpisuje identično potpisu na identifikacionom dokumentu koji prilaže uz prijavu.

(3) Uz fotografiran, skeniran ili u drugom elektronskom formatu snimljen obrazac prijave, koji je svojeručno potписан, podnositelj prijave putem online portala prilaže fotografirane, skenirane ili u drugom pogodnom elektronskom formatu snimljene sljedeće dokumente:

a) Obrazac prijave sa potpisom,

b) Dokaz o identitetu i

c) Dokaz o tačnoj adresi u inozemstvu za birače koji glasaju putem pošte izdat od nadležnog organa ili važeći lični dokument izdat od zemlje domaćina koji sadrži tačnu adresu boravišta u inozemstvu.

(4) Vjerodostojan dokaz o identitetu za birača koji privremeno boravi izvan BiH u smislu člana 3.15 Izbornog zakona BiH, smatra se elektronski priložen i važeći, jedan od sljedećih dokumenata:

- a) fotografisana, skenirana ili u drugom elektronskom formatu snimljena lična karta BiH – obje strane ili
- b) fotografisan, skeniran ili u drugom elektronskom formatu snimljen pasoš – dio sa podacima i slikom ili
- c) fotografisana, skenirana ili u drugom elektronskom formatu snimljena vozačka dozvola BiH – obje strane vozačke dozvole BiH

(5) Izbjeglo lice pored dokaza o identitetu iz stava (4) ovog člana može priložiti važeću fotografisanu, skeniranu ili u drugom elektronskom formatu snimljenu ispravu sa fotografijom izdatu od zemlje domaćina ili izbjeglički karton izdat od zemlje domaćina ili druge međunarodne organizacije.

(6) Birač u obrascu prijave za glasanje izvan BiH obavezan je da se izjasni o načinu glasanja, da li će glasati putem pošte ili u DKP-u BiH, uključujući i mjesto DKP BiH u inozemstvu. Ukoliko se birač ne izjasni o načinu glasanja u smislu ovog stava, omogućit će mu se glasanje putem pošte.

(7) Birač iz Brčko distrikta BiH koji nema određenu entitetsku opciju za glasanje, da bi ostvario svoje biračko pravo obavezan je da u obrascu prijave za glasanje izvan BiH navede entitetsku biračku opciju za Opće izbore. Ukoliko birač u smislu ovog stava ne navede entitetsku opciju, neće biti upisan u Izvod iz CBS za glasanje na Općim izborima i za te izbore neće moći ostvariti svoje biračko pravo za glasanje izvan BiH.

Član 27. (Obrada prijave – član 3.15 stav (5) Izbornog zakona BiH)

(1) Nakon prijema prijave Centralna izborna komisija BiH obrađuje prijavu kroz posebno razvijenu aplikaciju za birače koji glasaju izvan BiH (on line portal).

(2) U slučaju da prijava ne sadrži sve dokaze utvrđene u članu 3.15 stav (3) i (4) Izbornog zakona BiH, obrazac prijave je nepotpun ili nije ispravno popunjeno, Centralna izborna komisija BiH obavještava podnosioca prijave da je dužan da u roku od sedam (7) dana od dana dostavljanja obavijesti Centralne izborne komisije BiH, otkloni uočene nedostatke.

(3) Otklanjanje nedostataka, nepravilnosti ili dopunjavanje prijave i elektronske dokumentacije, podnositelj prijave može izvršiti isključivo putem online portala.

Član 28. (Odbijanje prijave član 3.15 Izbornog zakona BiH)

(1) Ukoliko podnositelj prijave ne otkloni nedostatak ili nepravilnost u prijavi na način utvrđen u stavu (2) i (3) člana 27. ovog Pravilnika, Centralna izborna komisija BiH donosi odluku o odbijanju upisa tog birača u Izvod iz CBS za glasanje van BiH.

(2) Za podnesene prijave za koje se provjerom utvrdi da ne ispunjavaju propisane uvjete, odnosno prijave čija vjerodostojnost nije utvrđena, Centralna izborna komisija BiH donosi odluku o odbijanju prijave.

Član 29. **(Obavještavanje i zaštita podataka)**

- (1) Centralna izborna komisija BiH o svim statusnim promjenama, nedostacima i odlukom o podnesenoj prijavi, podnosioca prijave obavještava putem online portala i e-maila navedenog u prijavi.
- (2) Podaci koji su dostavljeni u postupku prijave za upis birača za glasanje izvan BiH obrađivat će se u skladu sa Zakonom o zaštiti ličnih podataka BiH, vodeći računa o principima zaštite ličnih podataka.
- (3) Centralna izborna komisija BiH će po zahtjevu podnosioca prijave ukloniti sve podatke koji se nalaze na online portalu.

Član 30. **(Nefunkcionalnost i nedostupnost online portala)**

- (1) Centralna izborna komisija BiH u slučaju nepredviđenih okolnosti zbog kojih online portal nije u funkciji ili je nedostupan može koristiti drugi način elektronskog podnošenja prijave i dokumentacije za upis birača za glasanje izvan BiH.
- (2) O načinu promjene elektronskog upisa birača za glasanje izvan BiH Centralna izborna komisija BiH obavještava državljanе BiH koji borave izvan BiH putem zvanične internet-stranice, DKP BiH ili na drugi pogodan način.

POGLAVLJE VII. PRIJAVA ZA UPIS IZBJEGLIH LICA ZA GLASANJE IZVAN BIH KOJA NISU UPISANA U CENTRALNI BIRAČKI SPISAK, SADRŽAJ OBRASCA PRIJAVE I OBRADA PRIJAVE

Član 31. **(Prijava i upis izbjeglog lica koje nije upisano u Centralni birački spisak)**

- (1) Podnošenje prijava za upis izbjeglih lica u Centralni birački spisak je kontinuiran proces, dok se prijava za glasanje vrši u skladu sa rokovima koje utvrđi Centralna izborna komisija BiH za tekuće izbore.
- (2) Da bi izbjeglo lice koje nije upisano u Centralni birački spisak bilo upisano za glasanje izvan BiH, dužno je da podnese obrazac prijave za upis u Centralni birački spisak za glasanje izvan BiH na način utvrđen u članu 24. ovog Pravilnika.
- (3) Uz svojeručno potpisu prijavu zahtjeva za upis u Centralni birački spisak obavezno prilaže sljedeće dokaze:
- a) Dokaz o identitetu utvrđen u stavu (4) ili (5) člana 26. ovog Pravilnika,
 - b) Dokaz o državljanstvu, kopija pasoša BiH strana sa fotografijom i podacima ili uvjerenje o državljanstvu izdato od nadležnog organa ne starije od šest (6) mjeseci,
 - c) Dokaz o prebivalištu, kopija lične karte izdata prije 1991. godine ili da se nalazi na Popisu stanovništva BiH iz 1991. godine.
 - d) Dokaz o tačnoj adresi boravišta u inozemstvu, utvrđen u stavu (3) tačka c) člana 26. ovog Pravilnika.

Član 32.

(Izgled i sadržaj obrasca zahtjeva prijave za upis izbjeglog lica u Centralni birački spisak ZPU– član 3.15 stav (3) Izbornog zakona BiH)

(1) Izgled i sadržaj Obrasca zahtjeva prijave za izbjegla lica koja se upisuju u Centralni birački spisak za glasanje izvan BiH je sastavni dio ovog Pravilnika.

(2) Centralna izborna komisija BiH omogućava popunjavanje putem online portala ili preuzimanje obrasca prijave – ZPU iz stava (1) ovog člana putem internet-stranice Centralne izborne komisije BiH i internet-stranica državnih organa i drugih institucija koje se bave izbjeglicama i pitanjima migracije.

Član 33

(Obrada prijave zahtjeva – ZPU- član 3.15 Izbornog zakona BiH)

(1) Centralna izborna komisija BiH obrađuje prijavu zahtjeva za upis u Centralni birački spisak na način utvrđen Uputstvom, te ukoliko su ispunjeni uvjeti iz člana 31. ovog Pravilnika, donosi odluku o upisu izbjeglog lica u Centralni birački spisak za glasanje izvan BiH.

(2) U slučaju da prijava ne sadrži sve dokaze utvrđene u članu 3.15 stav (3) Izbornog zakona BiH ili je obrazac prijave nepotpun ili nije ispravno popunjena, Centralna izborna komisija BiH će obavijestiti podnosioca prijave da u roku od sedam (7) dana od dana dostave obavještenja otkloni uočene nedostatke putem službene internet-stranice Centralne izborne komisije BiH www.izbori.ba ili na kontakt podatke dostavljene u prijavi ili na drugi propisan način.

(3) Ukoliko podnositelj prijave ne postupi na način propisan u stavu (2) ovog člana, prijava lica za glasanje izvan BiH bit će odbijena, a odluka o odbijanju prijave objavit će se na službenoj internet-stranici Centralne izborne komisije BiH, www.izbori.ba, vodeći računa o principima zaštite ličnih podataka, u skladu sa Zakonom o zaštiti ličnih podataka.

(4) Centralna izborna komisija BiH na zvaničnoj internet-stranici objavljuje izvod iz Centralnog biračkog spiska za glasanje izvan BiH bez objave ličnih podataka, u skladu sa Zakonom o zaštiti ličnih podataka.

POGLAVLJE VIII. POSEBNE EVIDENCIJE

Član 34.

(Vrste evidencija – član 3.2 stav (3) i član 3.6 stav (2) tačka d) Izbornog zakona BiH)

(1) Centralna izborna komisija BiH vodi posebne evidencije o licima kojima je po osnovu zakona oduzeto pravo da glasaju, kako slijedi:

- a) licu koje je pravosnažnom odlukom nadležnog organa lišeno potpune poslovne sposobnosti i
- b) licu koje ima smetnje prema članu 1.6, 1.7. i 1.7a Izbornog zakona BiH.

(2) Evidencije iz stava (1) ovog člana, sadrže sljedeće podatke:

- a) prezime,
- b) ime,
- c) ime jednog roditelja,
- d) jedinstveni matični broj,
- e) naziv organa koji je donio akt,

- f) broj akta,
- g) datum akta i
- h) rubriku "napomena".

Član 35.

(Način evidentiranja – član 3.2 stav (3) i član 3.6 stav (2) tačka d) Izbornog zakona BiH)

(1) O licu iz člana 34. stav (1) ovog Pravilnika u rubrici "napomena" iz člana 3.10 stav (1) tačka i) Izbornog zakona BiH bit će evidentirane činjenice i ona se neće naći na izvodima iz konačnog Centralnog biračkog spiska.

(2) Evidentiranje se vrši na sljedeći način:

- a) za lice iz člana 34. stav (1) tačka a) ovog Pravilnika – PS broj i datum rješenja i
- b) za lice iz člana 34. stav (1) tačka b) ovog Pravilnika – IZ broj i datum akta.

(3) Ukoliko licu evidentiranom u Centralnom biračkom spisku bude vraćeno biračko pravo u skladu sa zakonom, podaci upisani u napomenu se brišu i licu se vraća biračko pravo.

POGLAVLJE IX. ZAVRŠNE ODREDBE

Član 36.

(Sastavni dio Pravilnika)

Sastavni dio ovog Pravilnika su:

- a) PBO – 1 obrazac zahtjeva za eventualnu promjenu biračke opcije raseljenog lica,
- b) PBO – 2 obrazac za promjenu biračke opcije,
- c) PRP – obrazac prijave za državljane BiH koji se prijavljuju za glasanje izvan BiH,
- d) obrasci izgleda izvoda iz Centralnog biračkog spiska (IPCBS – izvod iz privremenog CBS),
- e) obrasci izgleda konačnog izvoda iz Centralnog biračkog spiska (IKCBSR – izvod iz CBS-a – za birače koji glasaju na redovnom biračkom mjestu; IKCBSMT – izvod za birače s posebnim potrebama; CBSN – izvod iz CBS-a za birače koji glasaju nepotvrđenim glasačkim listićima; IKCBSO – izvod iz CBS-a za birače koji glasaju u odsustvu; IKCBSID – spisak za birače koji glasaju izvan BiH; IKCBSDKP – izvod iz CBS-a za birače koji glasaju u DKP BiH; ICBSOF – izvod za provođenje opoziva zvaničnika; ICBSMZ – izvod za izbore organa lokalne samouprave; ICBSPS – izvodi za političke subjekte) i
- f) potvrda za glasanje nepotvrđenim – kovertiranim glasačkim listićem za birača izvan BiH.
- g) PUCBS-prijava za upis u Centralni birački spisak izbjeglog lica

Član 37.

(Prestanak primjene)

Danom stupanja na snagu ovog Pravilnika prestaje sa važenjem Pravilnik o upotrebi i izradi izvoda iz Centralnog biračkog spiska ("Službeni glasnik BiH", broj 29/18), Pravilnik o izmjenama Pravilnika o upotrebi i izradi izvoda iz Centralnog biračkog spiska ("Službeni glasnik BiH", broj 62/18), Pravilnik o dopunama Pravilnika o upotrebi i izradi izvoda iz Centralnog biračkog spiska ("Službeni glasnik BiH", broj 25/20) i Pravilnik o izmjeni Pravilnika o upotrebi i izradi izvoda iz Centralnog biračkog spiska ("Službeni glasnik BiH", broj 38/20).

Član 38.
(Stupanje na snagu i objava)

Ovaj Pravilnik stupa na snagu danom objave u "Službenom glasniku BiH", a bit će objavljen u "Službenim novinama FBiH", "Službenom glasniku RS", "Službenom glasniku Brčko distrikta BiH" i na internet-stranici Centralne izborne komisije BiH www.izbori.ba.

Broj: 05-1-02-2-616-1/22
Sarajevo, 04.05. 2022. godine

